



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3

Army ketdangsür ta shia  
lanurtem ashioktsür ka apu

Amit Shah-i tongtibang  
scheme 3 sangdongogo

VOL. XX NO. 241 (ADOK 241) DIMAPUR RASEMNÜ (WEDNESDAY)

AAMI (JUNE) 14 2023

₹ 5.00

## CM Rio-i AHOds aser HoDs ayongzük

**Dimapur, June 13, 2023 (TYO):** Nagaland Chief Minister Neiphiu Rio-i Administrative Heads of Departments (AHOds) aser Heads of Departments (HoDs) dang mapa junga inyaksü aser public shitak yaritsü ayongzük.

June 13, 2023 nü Secretariat Conference Hall, Kohima nung AHOds aser HoDs senden nung CM Rio-i iba tayongzükba agüja liasü. Iba senden nung Deputy Commissioner tema video conferencing ajanga aden.

"Sorkari mapa inyaktermi jenjang balala ajanga nübertem tenzüksü maongka angu. Anungji sorkar mapa inyaktermi Nagaland aser sensotem ajungtsü aser renloktsü atema maongka ka ta züngshia inyaksüla" ta Rio-i ashi.

Nagaland state nung Department ajak tsüngda amalitep alitsüla aser yariteptsüla aser sorkar ketdangsürtemi nendaka inyaksüla ta paisa metetdaksü.

Centrally Sponsored Schemes aser Programs ajak mapang shitak nung inyaksüla anungji DC temi pei pei District

nung CSSs takok ngua inyaksü asoshi kasa tebilemtsü khuret abentsüla, ta CM Rio-isa ashi.

Paisa AHOds aser HoDs dang pei pei Department ajanga inyakba schemes teti reprangshimtsü aser mapang shitak nung tembangtsüsa inyaksü tetuyuba agütsü.

Chief Secretary Nagaland, J Alam, IAS-ia o jembidang AHOds aser HoDs ajanga sorkar policy aser programmes mapa kuma inyaksü ayongzük.

Nagaland Civil Secretariat, Directorates aser Government establishments ajak nung mapa inyaktermi anogoshia mapa inyaki arutsüla ta Chief Secretary-isa nenshia metetdaksü.

Iba senden nung Biometric set up system dak sendakba onük kar benoka jembi aser IT Department-i item khuret koktettsü nangzük.

Maneni, Finance Department-i CSS schemes atema SNA system indang presentation sayu aser Land Revenue Department-i Nagaland nung sorkar department tem indang ali dak sendakba presentation ka sayua liasü.

## RBI-i Nagaland nung sub-office lapokogo

**Dimapur, June 13, 2023 (Agencies):** Mongulbarnü Reserve Bank of India (RBI)-i Nagaland yimtiba Kohima nung sub-office ka lapokogo.

Kohima nung RBI office lapokba ajanga Northeast region nung RBI kongsang teimba kumogo. Tang tashi nung RBI-i Northeast state trok- Assam,

Meghalaya, Manipur, Mizoram, Tripura aser Nagaland nung office lapokogo.

Kohima nung lapokba RBI indang sub-office maparen ya tang atemabo Guwahati office ajanga ketdangsüa reprangtsü. Maneni, RBI-isa yakta Arunachal Pradesh yimtiba Itanagar nunga office ka lapoktsü sentong lir.

## NE state 3 nung tzunglu kanga maru; 4 nung talila aru

**Guwahati, June 13, 2023 (Agencies):** Tesüiba hopta ka tsüngda Northeast India tesem aika nung tzunglu aruogo aser iba mapang state kar nung tzunglu peria maru aser kar nungbo talila aru ta Indian Meteorological Department (IMD)-i Mongulbarnü metetdaksü.

Tesüiba anogo ishika tsüngda Meghalaya, Mizoram aser Tripura nung tzunglu peria maru saka Arunachal Pradesh, Nagaland aser Sikkim nung kanga aruogo, ta IMD-i ashi.

Meghalaya nung -45% rain deficit, Mizoram nung -65% aser Tripura nung -88% rain deficit liasü.

Külen, Arunachal Pradesh, Nagaland aser Sikkim nung 'large excess rainfall' aser Assam nung 'excess rainfall' liasü.

Arunachal Pradesh nung 68%, Nagaland nung 160% aser

Sikkim nung 158% tzunglu talila aru, ta IMD-i metetdaksü.

"Assam nunga excess rainfall 68% liasü aser Manipur nung normal rainfall liasü" ta Regional Meteorological Centre, Guwahati nung Deputy Director General of Meteorology Dr Sanjay O'Neill Shaw-i ashi.

Regional Meteorological Centre, Guwahati-isa taruba anogo pungu tsüngda Arunachal Pradesh, Assam aser Meghalaya nung tzunglu terara aser Nagaland, Manipur, Mizoram o Tripura nung tzunglu kanga arutsü ta asadangtetba metetdaksüogo.

Taruba anogo ishika Arunachal Pradesh, Assam, Meghalaya, Nagaland, Manipur, Mizoram aser Tripura nung tsüngmok atena aser tsüngi aia tzunglu arutsü ta Met department-isa ashi.

## Rozgar Mela: NE nungi nisung 57 nem appointment letters agütsü

**Dimapur, June 13, 2023 (TYO):** Linük ajungalen 'Rozgar Mela' sentong nung shilem ka ama North East nungi nisung 57 nem Centre sorkar department balala atema 'appointment letters' agütsüogo.

Mongulbarnü Imliyanger Memorial Hall, Dimapur nung Union Minister of State for Social Justice and Empowerment Pratima Bhoumik-i appointment letters lema agütsü.

"Prime Minister Modi-i recruitment process ya kum ka ser tesadang agiba nungi ita ishika tsüngda tembangtsü alizüng ayu. Mapa angurtemi Karmayogi portal ajanga skills angazüksü" ta Bhoumik-i ashi.

"Nenok ajak külemi yariteptsü aser linük yangerba nung shilem agia linük tejakleni anir aotsü ayongzükler" ta laisa ashi.

"Northeast ya India indang 'Asthalaxmi' lir aser iba ya goddess Laxmi indang tapu 8 lir. Tesüiba kum 9 tsüngda Northeast nung connectivity aser infrastructure kanga renlokogo" ta Union MoS Bhoumik-isa metetdaksü.

Tanü mapa nung shimokertem ya State Bank of India, Central Bank of India, Canara Bank, Indian Railways, Postal department, Nagaland Rural Bank aser NABARD nung lir.

Iba sentong nung General

Manager SBI Thangboi Lunkin-i tesentepertem pela agizük.

Mongulbarnü Prime Minister Narendra Modi-i video conferencing ajanga appointment letters 70,000 shi agüja liasü. Rozgar Mela ya linük kübok tesem 43 nung ayongzükba agi.

'Rozgar Mela' ya BJP aser NDA sorkartem atema maittsü tasen ka kumogo. 'Azadi Ka Amrit Kaal' tenzükogo anungji sorkar mapa inyaktermi asoshi iba ya tongtipang mapang ka lir. Tanü sorkar mapa nung tasen shimokertem taruba kum 25 tsüngda India ya tejakleni aoba linük ka kümdaktsütsü alizüng ayutsüla" ta PM Modi-i metetdaksü.

## DoSE-i sorkar school aser kaketshirtem tushi



June 13, 2023 nü Department of School Education and SCERT Commissioner & Secretary Kevileno Angami aser ketdangsürtemi takok angurtem den külemi agiba noksa ka angur.

**Dimapur, June 13, 2023 (TYO):** Directorate of School Education (DoSE)-i HSLC aser HSSLC exams 2023 nung takok tajungtiba anguba sorkar school asem nem tenüngsang agütsüogo.

Mongulbarnü DoSE indang conference hall nung agiba sentong nung Rüzühkrie Government Higher Secondary School Kohima nem Rs 30,000, Government High School Khulazu Basa nem Rs 20,000 aser Government High School Khar nem Rs 10,000 senpettem agütsü.

DoSE-isa Nagaland sorkar school tem nungi takok tajung anguba kaketshirtem nem tenüngsang agütsü.

HSLC 2023 best-performing government school asem nungi kaketshirtem nem Nagaland Government School Students Meritorious Award (NGSSMA) agütsü.

Iba sempet ya Rüzühkrie Government Higher Secondary School Kohima nungi Rahul Roy, Government High School Khulazu Basa nungi Monika aser

Government High School Khar nungi Arenchetla nung nem agütsü.

Maneni, toppers HSLC (Arts) asem nem NGSSMA agütsü. Mayangnokcha Government Higher Secondary School Mokochung nungi Watisangla (top 5), Government Higher Secondary School Tuli nungi Kilenkala (top 9) aser Government Higher Secondary School Jalukie nungi Kikogwamle (top 10) nungeri iba sempet agizükba liasü.

Ano, Government High Schools 29 aser Government Higher Secondary Schools 3 nem certificates of merit agütsü. HSLC aser HSLC exams nung 100% pass percentage anguba atema iba sempet agütsü.

Iba sentong nung Government High School Mangmetong teacher in-charge Longrimdang aser Government Higher Secondary School Naginimora vice principal Supongtola Aier nati school tem nung best practices award indang osang lemsatop.

Nagaland sorkar 2018-2019

nungi NGSSMA ya agütsü tenzük. Sorkar school kaketshirtemi primary, elementary aser secondary jenjangtem nung board tatidang nung takok tajung anguba atema iba sempet agütsür.

"100% pass results anguba school tem nung tesayur aser kaketshirtem aser ano subject balala nung distinction angur ajak nem tenüngsang agütsü" ta Department of School Education and SCERT Commissioner & Secretary Kevileno Angami-isa ashi.

Kaketshirtem, tesayurtem aser tsüraburtem külemi inyakba ajanga sorkar school temi takok tajung ngutetogo. Iba ajanga schools of excellency ta ajatsü langa lir, ta lai ashi.

Tesayur peria maliba aser infrastructure tajung maliba tayongzükbatem liaka sorkar school temi nija school tem den kasa takok tajung anguba kaketshirtem adokdaksüogo, ta Kevileno-i metetdaksü.

Laisa kaketshirtem takok anguba jagi teperi ta mebilemi maneni merangtsü ayongzük.

# CBSE ajanga NEP 2020 indang training agütsü



**Dimapur, Aami/June 13 (TYO):** National Education Policy 2020 dak sendakba nug anogo ka professional development training June 13, 2023 nü Central Board of Secondary Education (CBSE) Guwahati Region kübok Centre of Excellence (COE) ajanga

Livingstone Foundation International, Dimapur nung ayongzüka liasü.

Iba training nung shisalen sayur Kulmani Das, Administrator of DPS Numaligarh, Assam liasü, kong Nagaland aser anasa aliba Assam district tem nungi CBSE

nung affiliate süa aliba school tem nungi tesayurtem dena liasü.

Iba training sentong moatsür ama Dr. Andrew Ahoto Sema, Chairman, Livingstone Foundation International dena liasü, shiba iba training atema Venue Director liasü.

# NTPRDAO-i junga mejangjai RD Department dak tai tongloktsü: NSVDBA

**Dimapur, Aami/June 13 (TYO):** RD Department-i senotsü meshidak amshi ta NTPRDAO ajanga tai tonglokja osang kakat nung adoktsüba dak sendakba nung Nagaland State Village Development Board Association (NSVDBA) sangdong ka ajanga iba osang jangjashitsü.

liasü.

Anungji PMAY-G kübok teyari agirtem nem senotsü magütsü ta tai tongloktsüba ya mashi angateta sangdongba lir, ta NSVDBA ajanga ashi.

Teyari agir nem ki yanglutsü atema osetsüset agütsü. Anungji parnok account nung sen maitba ya sen meshidaki amshi ta memeyipzüksüla. Iba system ya Ministry of Rural Development (MoRD), Govt. of India temelaba nung amshir, ta ashi.

Ajisüaka teyari agir nem tashi tali agütsütsü mechi Direct Benefit Transfer (DBT) mode of implementation amshitsü lemtet, koba ajanga senotsü ya teyari agir indang account nung instalments asem lemsar indang-indanga inoktsür, ta NSVDBA sangdong ajanga ashi.

Mezüngbuba instalment ajanga ki ya 'foundation level' tashi yanglutsüla, tanabuba instalment ajanga 'intel level' tashi aser instalment tasembuba ajanga ki renemtsüla.

Ministry of Rural Development ajanga 'DBT mode of implementation' inyakyim agizük aser tang teyari agir shia indang account nung indang-indanga sen 1,30,000 inoktsür.

Teyari agirtem asoshi yokba sen tim agizüka agir ta tai tongloktsüba ya khenyongi tamendak dak maka aser tenüng menüktsüba lir. Tang system nung cheques amshia sen agizükba khenyongi memelar, kechiaser senotsü agizükba aser inokba ajak PFMS nung sayur, koba MoRD ajanga kanga junga repranger. Anungji senotsü meshidaki amshi ta NTPRDAO-i tai tongloktsütsü madoker aser osang tejangja memeteti tapi agi Department dak tai tongloktsüba nüburtem mangmangdaksütsü melena parnoki (NTPRDAO) tejangja metettsü asoshi yimdak-yimtsüng nung aliba lokti tentet den mena jembishinütsüla, ta NSVDBA ajanga ashi.

Department aser iba indang ketdangsür tenüng menüktsüba ya tamendak dak maka aser it aka majung lokti tentet kati tiazi nung tai tongloktsütsü meimlar. Iba Organisation tasenba ya RD Department anema pei agitsü tebilemba nung nisung kar kumzüksü asoshi tenteta alitsü bilema alitsü, kechiaser NTPRDAO ya May 31, 2023 nü ang tentet, ta NSVDBA sangdong ajanga ashi.

# Bangladesh PM Sheikh Hasina-i CM Rionem titi agütsü

**Kohima, Aami/June 13 (TYO):** Bangladesh Ato Kilonser Sheikh Hasina-i Nagaland Chief Minister Neiphiu Rio dangi titi (mango) tajung yoka liasü.

nung amentsü Kohima-i arua liasü aser iba ya ajanga shishilempaba tesendaktep tashi itshitsü asoshi local entrepreneurs tem den sensaksemtsü sapang agütsür aser arütsü alema shishilempatsü maongka agütsür, ta pai shia liasü.

Twitter post ka nung CM Rio-i ashiba agi, kidanger linük indang lenir nungi titi tajungtiba anguba atema kanga pelar.

Bangladesh Ato Kilonser Hasina-i Northeast indang chief minister ajak dangi titi ya yoka liasü.

India Ato Kilonser Narendra Modi aser Bangladesh Ato Kilonser Hasina kübok India-Bangladesh tesendaktep tali tashi itshitsü imlar, ta pai ashi.

Laisa West Bengal Chief Minister Mamata Banerjee dangi sempet ama titi seret 600 yoka liasü.

Amalitep alitsü asoshi linük anaprongi lenmang bushir aser linük ana tesendaktep atema Northeastern region yagi tongti shilem agitsü ta angateta lir.

"Tesendaktep tajungba akumtsü nükjidong nung Banerjee dangi yokba titi nungya 'Himsagar' aser 'Langra' tabu densema liasü. Taoba küma onoki titi yok," ta Kolkata nung aliba Bangladesh Deputy High Commission ketdangsür kati Hombarnü ashi.

Northeast aser Bangladesh tesendaktep tajung lir aser iba tesendaktep nungi Nagaland ajangzüksü, ta Rio-i April ita shia liasü.

Taoba küm lai Ato Kilonser Narendra Modi aser ano West Bengal, Tripura aser Assam chief minister tem dangi sempet ama titi yoka liasü.

Abdul Matlub Ahmad-i anir India-Bangladesh Chamber of Commerce and Industry (IBCCI) indang business delegation tuluka Bangladesh nungi B20 senden

# Mkg. Police-i mim mozü bena alir 2 apu



P.Lipongchem aser Litongse Sangtam noksa nungji angur.

**Mokokchung, Aami/ June 13(TYO):** Mokokchung Police-i June 12 nü Settsü Yim Lenjem nung gari senzüsempogertem soita mita reprangba mapang ka nung Maruti Ecco AS 04 X 7679 nung Spasmo Proxyvon Capsule bena aliba apu.

Sangtam jabaso arishi küm 38 tain Litongse Sangtam aser Mangakhi yimera Lt.Bunsokyu jabaso arishi kum 41 tain P.Lipongchem tena ket nung Spasmo Proxyvon Capsule 2153 bena aliba apu.

Tuensang district nung Longkhim Police Station kübok aliba Mangakhi yimer Holise

Iba maparen ken o ya Mokokchung Police-i case ka Mkg.PS-II Case No 0029/23 U/ S 21(c) NDPS Act R/W IPC nung zülüokogo.

# ASU aser AWO ajanga HSLC & HSSLC tatidang nung takok angur tushi

**Dimapur, Aami/June 13 (TYO):** Angami nunger HSLC aser HSSLC Examination 2023 nung takok tajung angur nem tenüngsang agütsüba sentong ka Angami Students' Union (ASU) aser Angami Women Organisation (AWO) nati AWO Ki, Kohima nung June 13, 2023 nü ayongzüka liasü.

sobaliba yimyattem agi pei career nung tetsükdaktsü magütsütsüla, ta pai ashi.

Iba sentong nung o jembir Project Director, TaFMA, Dr. Hovithal Sothu-i HSLC aser HSSLC tatidang nung temaba jenjang nguteter nem tenüngsang agütsü aser parnok takum nung takok angutsü asoshi ibai mera mezüngbuba lir, ta ashi.

Pai kaketshirtem dang pei nükjidong tejangja ayutsü aser aji metongtet tashi indang-indanga nokdaksü ayongzüka aser nungdakra career guidance aser counselling nungi teyari agitsü nunnganga malitsü ayongzüka.

Tesüba küm tem dang nungi taküm result tajungba liasü aser Angami nunger rongnungi HSLC aser HSSLC tatidang nung taküm top 20 jenjangi kaketshir 24 ai, ta pai ashi.

Pei wadang nung lenmangji imlaba ama testüsü masütsü, aser asen takum nung tamakok ajuruba agi tetsükdaktsü marudaktsütsüla. Anungji tasü ita meranga inyakang, ta pai ajungshi.

Pai kaketshir aser tsürabortem dang parnok takok nung temolung sür malitsü aser maneni meranga azüngtsü ajungshia liasü. Pei nükjidong metongtet tashi

Tang nungi tetoktepbaba tali tesashiba asütsü aser tanü putu nung tanabuba jenjang angur asoshi kecha mali, anungji mapang tatakzük makai meranga inyaksüla, ta ashi.

Dr. Hovithal Sothu-isa kaketshirtem dang civil service examination nung temolung agütsütsü ashi aser 'Ola madoki meranga inyakang aser takok nem ola adokdakjang," ta shia pa o tembang.



Settsü (Mokokchung), June 13, 2023: NIPUN Bharat mapatong kübok Mongolbarnü GMS, Settsü nung school tanurtem Art & Painting agidang tangokba noksa nung angur. Telung noksa nung lower class nung azüngertem angur. School tanurtem lenla balala nung tamendakdak junga yanglutsü nükjidong nung New Education Policy (NEP) 2020 mapatong dak sendakba nung NIPUN Bharat (National Initiative for Proficiency in Reading with Understanding & Numeracy) kübok sorkar school tem nung June 1 nungi tenzüka June 15 tashi sentong balala agitsü.

# Cyclone Biparjoy: Nisung 4,700 dak tema aninogo



Biporjoy yipru kanga sashia akumba mapang ka nung police temi Mumbai nung Juhu Beach-i nüburttem meyoktsü atema tenokdangba agütsüogo.

**New Delhi, Aami/June 13 (Agencies):** 'Biparjoy' yipru gi konshitsü lia Gujarat kübok Dwarka district nung tzüküm nung aliba yimtsüngtem nungi nisung 4,700 dak tema Mongolbarnü aninogo.

District administration-i ashiba agi, Mongolbarnü anepdang tashi nung Dwarka district nung alir nisung 4,500 dak tema tekümzükdak tesem bushia aninogo aser ano maneni nüburttem anindar.

Gujarat Minister Parshottam Rupala-i Mongolbarnü Dwarka nung yipru atema renemshiba aser tensa asadangogo aser iba tesem nung amenoka aliba National Disaster Relief Force

(NDRF) team dena konshitsü akok. India Meteorological Department-i, iba yipru ajanga Gujarat kübok Kutch, Devbhoomi Dwarka aser Jamnagar districts kanga mejungi kongshia raksatsütsü akok ta ashiba mapang Union home minister Amit Shah aser health minister Mansukh Mandaviya nati Mongolbarnü lepareprangshiba senden ka ayongzuka menogo.

Cyclone Biparjoy ya Jakhau Port anasa Saurashtra aser Kutch tzüküm June 15 nikonngtsütsü yipru tesashi ka ama süia aotsü imlar. Iba yipru indang wind speed 125-135 kmph aser gusting 150 kmph asütsü imlar.

IMD-i ashiba agi, taruba ghonda 24 tsüngda Dwarka, Jamnagar aser Kutch district tem nung tzünglu kanga sashia arutsü aser iba ajanga item district tem dak kanga mejungi

# Odisha train tsükokba lendong nung asür 289 jungogo

**New Delhi, Aami/June 13 (Agencies):** Mongolbarnü Bihar nungi arishi küm 35 tain aayanger ka asüba sülen Odisha train tsükokba lendong nung asür nisung 289 jungogo.

Bihar kübok Motihar district nungi Bijay Paswan ya June 2 nü tangar trok den Howrah nungi Kerala kübok Palakkad-i aotsü atema Coromandel Express nung tua amen.

Raja Patel shiba iba telok nung densema liasü pa train tsüktepa tesem nung süatok.

Paswan ya mezüngbo Balasore district headquarter hospital-i anir ao aser iba sülen Cuttack nung SCB Medical

College and Hospital central ICU-i anir ao. Pa tongtired yirua liasü. SCB Medical College and Hospital nung doctor temi ashiba agi, Paswan ya mezüngbo orthopedics department nung admit asü ajisiaka pa temang tamajungba küma ao.

Iba sülen pa tangula sadema mesashiteti küma June 7 nü central ICU-i anir ao. Mongolbar anepdang tashi pa intubated nung liasü saka 7:30 ako shi nung cardiac arrest süa 9:50 ako nung asü, ta mozüki nungi sangdong ka ajanga metetdaksü.

Iba lendong nung yirurtem parnok 118 tang tashi temang

anepaludar. Iba train tsüktepa lendong nung nisung 289 asü aser nisung 1000 dak tema yirua liasü. June 7 nü Yeshwantpur-Howrah Superfast Express, Shalimar-Chennai Coromandel Express aserkhu abenba train ka ta tsüktepa liasü.

Shalimar-Chennai Coromandel Express yagi anena aliba train ka dak orr atsük aser iba ajanga coach aika derail asü.

Deraül sür aliba coach tem kar tanga track ka nung tsük aser ano Yeshwantpur nungi arua aliba passenger train; Howrah Express-i item coach tem dak atsük.



Centre sorkar kümteter küm 9 ajungba nüngdem nung BJP office, Gurugram nung 'tiffin charcha' sentong agiba mapang Union Minister for State Rao Inderjeet Singh-i shilem agiba noksa nung angur.

# PM Modi-i appointment shiti 70,000 dak tema lemstsü

**New Delhi, Aami/June 13 (Agencies):** Ato Kilonser Narendra Modi-i video conferencing ajanga Rozgar Mela nung mapa nung tang tasen shimmer 70,000 dak tema nem appointment shiti agütsüogo.

"Sorkar wadangi aiteritem atema iba ya kanga tongtibang mapang ka lir, kechiyong 'Azadi Ka Amrit Kaal' tenzükogo aser tang mapa nung shimertemi, India taruba küm 25 tsüngda developed country ka kümdaktsütsü asoshi nükjiong aliba tejakdangi bener aotsü," ta PM Modi-i ashi.

Ato Kilonser-isa, the 'Rozgar Mela' ya NDA-BJP sorkar indang maitsü tasen ka kümogo ta ashi. Taoba sorkar aija pai, yimden yimsüsüba nung inyakyim meshidakba, ochi mashi inyakyim, scheme meshidaki inyakba, nüburttem rongsen mashiymi amshiba ya parnok maitsü liasü, ta ashi.

Linük nung mapa inyaktsü atema maongka agütsüba

indang jembiba mapang pai, "tanü public aser private sector naprongla nung mapa inyaktsü atema maongka tasen adokdar. 'Startup India' aser 'Stand-Up India' amala scheme tem ajanga India nunger lanurtem tashi taitba kümdaktsüogo," ta ashi.

Paisa, Centre nung BJP-i aniba sorkari lanurtem tarutsü kümzuka toktsütsü atema inyakdar ta ashi.

Mapang nung aniokba inyakyim ta taoba mapangbo küm ka mesüra küm ka ser tesadang tashi agia liasü saka tangbo ita ishika tsüngda ochi mashi inyakyim kecha melei tembanger, ta pai ashi.

2014 nung onoki sorkar kümtetba mapang mapa nung aniokba inyakyim nung ochishiba inyakyim tenzük aser nepotism tembanga liasü, ta pai ashi.

Ato Kilonser-i ashiba agi, India jenjang ya taoba mapang dang nungi tang tajungba aser tashi taitba lir.



Conversion case ka nung aitsü alir rongnung tongtiba Shahnawaz Maqsood Khan, temang anepalutsü atema Ghaziabad nung district mozüki kati anir aoba noksa nung angur.

# Amit Shah tongtibang scheme 3 sangdongogo

**New Delhi, Aami/June 13 (Agencies):** Union home minister Amit Shah-i Mongolbarnü, sen crore 8,000 alang tongtibang scheme asem sangdongogo, kong state ajak nung fire brigade services modernize asütsüba, tongtibang yimtem nung tzümetsüng nungi jenboa alitsüba aser state 17 nung anentsüh aluba nokdangtsüba densema lir.

State aser Union Territories tem disaster management ministers tem senden nung o jembiba mapang Shah-i, linük nung lendong balala atalokba mapa nisung taküm ka danga mesamadaktsütsü asoshi jenjang tapet agitsü ayongzuka liasü.

"Fire brigade services modernization aser atsülangtsü atema state ajak nem sen crore 5,000 shi agütsütsü. Onoki sentong kanga junga renema lir aser nenok nem agütsütsü. Yimti tongtibang tenet; Mumbai, Chennai, Kolkata, Bengaluru, Ahmedabad, Hyderabad aser Pune nung tzümetsü aruba nokdangtsü atema sen crore 2,500 agütsütsü. Sentong tejangja nenok dangi yoktsü.

"State 17 nung anentsüh aluba nokdantsü atema sen

crore 825 central sorkari agütsütsü," ta pai ashi. Home minister-i ashiba agi, ajak nükjiongji lendong balala ajanga nisung taküm mesamadaktsütsü asoshi asütsüla.

Shah-i ashiba agi, National Disaster Management Authority (NDMA)-i, nuclear power stations tenet yanglua aliba state tem semdangogo aser item state tem nung parnoki benoka inyaksangshitsü atema inyakyim tesashi ka yokogo, ajita asünungdang lendong nungi jenboa litettsü.

Maneni home minister-i, taoba küm teku tsüngda centre sorkar den state temi disaster management dak sendakba nung takok aika ngutetogo, saka shinga iba dak temulung sür malitsüla kechiyong lendong balala atalokba yimya melenshidar aser tang tesashiba kümogo.

Shah-i ashiba agi, 'Aapda Mitra' scheme kübok lendong balala agi mapangshia kongshiba district 350 nung lanur volunteers lakh ka renemtsüdar aser iba ajanga lendong atalokba mapang teyari aika agütsüogo.



## TIR YIMYIM YIMOBILEM (EDITORIAL)

DIMAPUR RASEMNÜ, AAMI (JUNE) 14, 2023

### NPF asü NDPP ?

India küboksa süaka Indian National Party nung kena metendang, Nagaland nung 'Regional Party' United Democratic Front (UDF) tentetba anogo nungi tang tesüsa Naga People's Front telok tashi tenzüka arusang arishi küm 86 Kohima nunger Dr. Shürhozelie Liezietsu joko NPF tir menden toktsütsü ta metetdaksüba osang jagi Nagaland nung regional party ana NPF aser NDPP nung temelenshi adokdisü ta bilemer. Nagaland nung Naga nunger yimten yimsüsürtem rongnung election nung adokmadok ta mali mesüra ruling nung mesüra opposition nung ta mali, yimten nung ali tepiyong Naga regional party nung dang adenba mesüra Indian National party nung dang dena aruba aikabo mali, kechiyong asenokbo, tangar ama masü, rongsen nunga sensaker aser tangatetba nunga sensaker, anungji yimten nung süaka yimten angatetba sülen masü saka takok aser rongsen angulen bushia aoer. Idangji, tzü aolen ango ao ama, manger sangwa nung regional nungi national party-i orr alir aser national party nung alirtema khen nung regional kümer alir. Aji oda, India nung Congress teloki yimsü asüba mapang Nagaland nunga yimsüsür ajak Congress akümba asenoki ajangshia aruogo. Ano, tang BJP teloki yimsü asür asünungji election mapang BJP ticket raktepba asenoki nguogo. Parnokji dang masü saka tanga yimten telok nungi adokertema NDPP dena telok ajak BJP den dena lir. Itemji, asüng Congress teloki yimsü asütsüsa mapang ka arunungbo, ano tsüklu mena aliba bushia oru ozü telok ao ama, yimsüsürtem ajak Congress kümer alitsü. Iba amaji taküm arishi tatsüka nung ya Naga nunger yimsüsürtem teimbaka aonung regional saka anepdangbo national party ta party melenpet melena 'ruling' telok nung dang dena senzüdang, regional telok nung dang khena mongjen maitsüi alisangji Dr.Shürhozelie ya ka asütsü. Ibayongji, tambur süaka lanurtemi matsüngdokterter aser pa aliba agi kasa telok nung adener yimsüsürtema pei mulungba nung sademsadema mawazütet timtem ajurur. Iba jagi pai aniba telok nung aikati takoksa marem toktsür aoer. Atangji, küm metsü jakdang NNDP agi akümba Naga Peoples Council (NPC) tasür lia Congress telok nungi Neiphu Rio aser K.Therie nati anir NPC agi NPF aküm aser election nung takok ngua government aküm. Iba mapang nung jagi tang tashi Dr.Shürhozelie NPF tir inyaka arur. Aji oda, paa regional party nung khena matsüngshii aliba temoatsü 2017 küm Chief minister ita ishika inyakogo. Joko, tangbo shisatsü aser tangatetba meputepba agi Rio-i anir ano regional telok ka NDPP küma lir aser K.Therei-bo ano Congress telokisa meyipa orr yangji kanga meranga inyakba angur. Taoba mapang nung aiben NPF aser NDPP telok na longjemtsü amai olulua mesük aser ochia mesük ta jembiba asenok angashiogo. Iba oluluji shitak mapa küma meinyaktetbaji NPF tir Dr.Shürhozelie-i memulungba ajanga matalok ta jembiba angashi. Aji shitak asütsü südi, kechiyong pajibo government nung menden tajung ka atatsü bilema pei tangatetba mashiibo memelenshitsü. Itemji kodang asadanga bilemdangdir, kobanü Shürhozelie-i NPF tir menden toktsüdir, iba anogo nung jagi NPF o NDPP na anasatibai aru tenzüksü. Atangji, tanga NPF telok nungi adoker MLA anabo NDPP teloki aniba government nung dena lir, ajisüaka telokbo meloktep. Aji oda, Shürhozelie-i tekong merangba ajanga taoba küm Rajya sabha MP K.G.Kenye dena NPF telok toktsür aotsü akümba asenoki meteta lir. Ajisüaka, kodang Shürhozelie kidang melilir, item ajakji sademsadema ajurutepe asa lentong atongtsü mapang tajung angutsü. Tang government nung BJP 12 aser NDPP 25 lir. Iba jagi NDPP mesademi lir. Ajisüaka, kodang taruba October ita nung Shürhozelie NPF tir menden nungi aludir, ashiko NDPP o NPF na ano khen longjemshir tenüng ka dang akümtsüa akok aser idakji, shibai metet, NPP anioker tatar semer dak tali akümtsü ana nung lir.

## OLEMSABANG

### LOKTI-TENTET ALIBAJI TAJUNG SAKA TALI MEDENTETTSÜLA

- L.Kika Pongener

*(Maneni yashi adok nungi...)*

Asen Naga nunger ya benjong-bentsü kanga sapuba kin, talisa Ao kin ya benjong/longso-longpen onsara sapuba kin, aser lokti-tentet ajakji lokti-senden, Jubilee/Mongdang/Benjong-bentsü tapu-tapu amongtsü, aser iba atemaji khangtepa saru sarutsü, aser ibajagi kibongtem aika senak adener. Lokti-tentet kwika lidir tanishir (Leader) paikaji alitsüsa adoker, aser lokti-tentet ajak nung tanishir menden raktep dang mepetmesu, tenukmeremtep aser tsükchitep, telemsa aser nubur tsüngda meputep adoker. Kodang lokti nung telemsa adoka tsükchitep lidir, iba linuk aser iba yimtsüng nungji kodanga nuburtem sunepa yimjung nung malitsü. Kodang yimtsüng ka nung nuburtem tsüngda nung sunepa yimjung nung melilir, iba linuk aser yimtsüng nungjagi alima yanglur, alima lenir, tashitemeteter, watsü-wabong, lanur tajung alimai metettsüsa madoktsü, saka alima raksatsür, lokti menentsür aser tangar dak mangyangtsü shisatsü agi asüngba lanur kiralongrar (Terrorist) lanur-ang jenti adoktsü.

Lokti tentet koba sudir suaka, nubur asoshi aser alima asoshi tajangzük aser teyari agütsüba lokti tentet ka dang asütsüla. Koba lokti-tentet sudir suaka, iba telokji tanga lokti-tentet nem timtem aser pesaperong agütsüba lokti-tentet ka masütsüla. Koba telok sudir suaka lokti ka tenzüka nukjidongji kanga tesadem aser nubur ajak longjema anidaktetba/litetba aser tashishitsü maketba telok ka asütsüla. Koba-lokti tentet sudir suaka, alima aser nubur nem tajangzük melena timtem/pesaperong agütsüba telok ka masütsüla. Tanü putu nung lokti-tentet 'Non Governamental Organisation (NGO) aika nuburtem nem tajangzük agütsüba lokti-tentettem lir. Rotary Club aser Lion Club ama...item lokti-tentet yagi nuburtem nem tajangzük kanga agütsür aser nubur ajungtsü asoshi mapa tajung aika dang inyaker. Hospital, School, College aser Community Center yamala tesemtem nung Tzüpo (Well) tutsür, tajemtsü tzü (Drinking Water) yutsür aser mapang shia sensakertem aser mokokmeinertem asoshi angadi mozü-mora agütsüba aser taneptsüba mapa (Medical Camp) lapoka nuburtem ajangzükdaksür. Ano temang tenuk-telen tenuk, tenarong, tetsüng-tepen lemtar alirtem angadi 'Operation' agitsür aser nungdakba osettem angadi teyari agütsür. Anungji asen Naga nunger-ia yamala lokti-tentetemi inyakba mapa tajungtem ajizüka inyaktsü merangtsüla. Asen Naga nunger lokti-tentet teimba ka sen tetemlok agi aposhia amshiba telok aser ano telok karbo sen khangtepa saruteper Ak tepseta chiyungteptsüba lokti-tentet tenteta ayur. Yamala lokti-tentet onsaraba yagi asen lima telungi alur aser sensak adener ta metetdi. Anungji koba lokti-tentet sudir suaka alima aser nuburtem nem tajangzük agütsüba lokti-tentet dang asütsüla. Aser kokrabang lokti-tentet ya aika metenzükang tajungba asütsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir**

### Linük nung tesempatep aser azüdokshi anema Khristanpuri longkak ait



**New Delhi, Aami/June 13 (Agencies):** India kübok state balala nung Hindutva telok temi Khristanpur anema mapa tamajung tali inyakba anema Deobarnü Khristanpur meyirijang aika Jantar Mantar, New Delhi nung adenshia longkak aita liasü.

Chhattisgarh, Jharkhand, Madhya Pradesh, Uttar Pradesh, Karnataka aser linük nung danga tesemtem nung Hindutva telok temi tawa Khristanpur merenshiba anema iba longkak aitba sentong ya ayongzüka liasü.

Iba sentong nung arogo aser tentet 100 shi aser nisung 15,000 dak tema adenshia shilem agia liasü.

"Chhattisgarh, Jharkhand, Madhya Pradesh, Uttar Pradesh, Karnataka aser danga states tem nung külem senso aser Khrista dak amangertem indang fundamental rights rakzüka asoshi temolung shirangba sayua asenok tanü Jantar Mantar nung yimjung nung adenshia lir," ta United Christian Forum indang tir Dr Michael William-i iba

sentong nung ashi.

Parnokisa Tir Droupadi Murmu dangi tezüluba ka agütsütsü aser la dang Khristanpur dak tenük yoker azüdokshiba tebilemsü asoshi retired Supreme Court judge ka tekolakba sür National Redressal Commission ka tentetsü ajungshitsü, ta ashi.

"Tanen makai Khristanpur anema o tamajung jembiba aser azüdokshiba ajanga tamangertem dak kanga sashia kongshia lir," ta memorandum nung ashi.

### Nigeria nung Khristanpur reshikangshiba atema inyaktsü UK sorkar dang ajungshir

**London, Aami/June 13 (Agencies):** Nigeria nung Khristanpur kin ajunga samatsütsü meranga lendong balala agütsüba anentsü asoshi mera tali agiang ta tezüluba ka UK sorkar nem taoba hopta agütsü.

Aid to the Church in Need (ACN UK) ajanga tezüluba ya taoba Hombarnü Prime Minister's Special Envoy for Freedom of Religion or Belief, MP Fiona Bruce nem Nigeria nung Penticost Sunday 2022 nü tekülem ki ka maker küm ka ajungba anogo agüja liasü.

Nigeria southwest tsütsü Owo nung June 5, 2022 nü extremists temi St Francis Xavier's Catholic Church amakdang nisung 41 tepset aser nisung 80 dak tema yiruja liasü.

Bishop of Ondo, Jude Arogundade, shiba kübok Owo ya lir, pai ACN dang ashiba agi, iba lendong ataloker küm

ka jungaka mapa tamajung inyaker tang tashi meputeti lir.

Nigeria nung aliba Khristanpur aikati alimai parnok memetet mesüra memeimer ama bilemer, ta petition ajanga ashi aser aibelener nem tapet temerenshi agütsütsü asoshi mapa inyaktsü ayongzüük.

"Pentecost Sunday 2022 maka nisung jenti takum samatsüba aser ano zünger mezüngmai tamangertem tepsetba, pua bener aoba aser mapa tamajung inyaker nem tapet temerenshi agütsütsü asoshi Nigeria sorkar ajungshiang ta UK sorkar dang ajungshir," ta zülua liasü.

"Kiralongrartem pua tepuokdak ayutsü, ali aser yimtsüngtem meypa agütsütsü aser ki o jen raksatsüba aser takum samatsüba atema teyari sen agütsütsü atema UK sorkari akhangtsüla."

Iba tekülem ki maker küm ka ajungba anogomung nung jembidang, alima dang kiralongrar temenen indang nenshia ashitsü tongtipang aser iba lendong ajangshir aliba kibongtem zübu talangka maneptsü, ta Bishop Arogundade-i ashi.

"Iba anogomung ajanga tang tashinung asenoki kechi inyaka alir aser tang tashi timtema alirtem anisüngzütsü asoshi kechi inyaktsü aji takzütsü maongka agütsür," ta pai ashi.

Mang yima aliba arogo anisüngzütsü asoshi onoki sarasademba nung tangateter nisung ajaki adentsü onok teimla lir, ta pai ashi.

Lendong timtem ajurur alirtem molung süngzütsütsü asoshi asenok teinyaktsü jenti lir. Asenoki kechi teyari agütsütetdir, ajiaki aseni nungdakba aika peritsü."



Yirusalem yimti tejenba jara anasa Yisu Khristai Pa nütsüngtem den tatembangbuba Kibuba Benjung agiba takdang noksa nung angur. 'The Room of the Last Supper' ya Israel nung Khristantemi kanga sapua semdangba tesemtem rongnung densema lir. Yisu Khristai nütsüngtem den tatembangbuba Kibuba benjung agiba indang ya Laishiba nung osangtajung kakat Mathi 26:17-29, Mark 14:12-25 aser Luk 22:7-38 nung zülua angutsü.

### ANOGO ABEN TSÜNGREM DEN

#### Nisung Yimya Lipok 1: 24-31

Atangji alima nung aliba shiruru dang nungi meimchirji balaka asü ? Shiruru lima nung meimchir indang shisadangtsübaji kuli aika lir. Tanga shiruru ama pa asor, tangu sashir, achir, mejanger aser asür.

Kechi nung balaka ? Khristan theologyji nisungji Tsüngrem mesüka yanglu ta ashir (Lipok 1:27). Shiruru yamaji masü. Teyangluba nung nisungji balaka yanglu ta sangdongbaji asenoki metettsü tenügdaktsü. Pa Tsüngrem dang nungi teküpbokba kechiaser pa Tsüngremi yanglu, pa shiruru dang nungi temaba kechiaser pa Tsüngrem mesükba nung yanglu.

Atangji asenok tetsübutsü ka aser tesüngmangtsü ka yanglu (T.Ken 139:14). Itemi shisadangang: Laishibai ashir, asenok shiruru dang nungi temaba. Süra kechiba aikati akhüm dang nungi teküpbokba nung shiruru jakla ama alir aser inyaker ? Meimchir libaliro ajak nung asenoki shibai asenok Pa mesükba nung yanglu, Pa ama alitsü merangtsüla.

Ne tashikang akhüm kübok ni miimang : tenükjang ama ni kümzü kang. T.Ken 17:9.

### Pakistan nung Islamist temi Khrista dak amanger ka züka merenshi

**Islamabad, Aami/June 13 (Agencies):** Online video ka prokshiba nung Islamist telok kati Pakistan nung Khrista dak amanger dokan kibur tain ka dak süngpak agi züka merenshia liasü.

mesüshia liasü ta ashir. Iba ama mapa tamajung ya tanen makai inyaka arua liasü aser tetsürtem sadoksayim mesütemi liasü. Khrista dak amanger lanurtem aser Muslim nunger tsüngra teka sangshitep aser Muslim nungertemi ano nisung ayongsema liasü.

British Asian Christian Association (BACA) ajanga ashiba agi, May 22 nü arishi küm 61 tain Yaqoob Masih ya Daska, Punjab kübok Sian Village nung par dokan nung mena iba timtem ya ajurua liasü.

Iba mapang Khristanpur ka dak kanga mejungi azük aser paji arishi küm 26 tain Akash Masih liasü.

Item telok ya dokan telungi aita süngpak tulu agi züka merenshi. Iba video nungya dokan kibur ali nung mena alidang pa dak teka sangshir temi süng-long agi tepa liasü.

Pai BACA dang ashiba agi, "Mapang talangka nunger item teburtemi asen adianutsürtem mesüshia aser yimya tamajung sayua arua liasü."

Masih ya Daska nung aliba Tehsil Hospital nung anogo ana among aser yangji pa tepok achichilen yirua aliba, teka achichilen lokpeta aliba aser teka nung zübu keta aliba anepalua liasü. Pa kinungtsü arishi küm 55 tain Parveen Bibi daka item nisungtem yagi teka sangshi aser o tamajung shia liasü.

"Ojang süang; onoki marezükteti akum. Kodasür asen adianutsür yamai mezüngmeshidaktsütsü? Onoki anasa aliba police tem dang ashi, saka parnoki kecha meinyak."

Masih'er kinunger ka dak item telok yagi züka merenshi aser pa tekolak aser teka nung zübu liasü.

May 22 nü Masih'er dokan raksatsüba sülen Muslim nunger telok ka ya yumtsüng telungi ai aser dokan aser ki raksatsüyonga ao. Ibai May 3 nü sarasadem sentong sülen atalokba atema Khristan puri okadak ken o benokba agientsü memolungba mechi lir.

Sian yimyak May 3 nü Khristan tsürtem United Reformed Church nung sarasademer kidangi aodang Muslim nunger tebur kari merenshiba anentsü Masih'er kinunger tebur kati ashiba sülen iba lendong ya ataloka liasü.

BACA ajanga sangdong ka nung ashiba agi, "Sian nung Muslim nunger ya takataitertem lir aser parnok yimtenren tsütsüa tashi tait. Yangji Khristan kibong 30 shi lir aser parnok timba alu nung ayangertem lir. Iba tesem nung Khristanpur mesüshia aser merenshia amshir, aser ano Muslim nunger temi tali sempaba ajanga parnok teimla nung mener lungbang aser la samar lir."

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Raongrapi**

(n) kidong balala ( different phyratries)  
\* Yim ka nung **raongrapi** anasembabosa alir.

**Rapi**

(n) tetsür kin balala tsungda jatepba ( form of feminine address between different clans)  
\* Imchalar o ayoklar na **rapi** ta jateptsü akok.

**OLONG PAITEP # 6545**

	1			2	3				
4			5						6
					7				
	8								
	9			10				11	
						12			13
14									
					15				

TIPLIN		LANGTSÜNGLEN	
2. Sü jeplok	- (4)	1. _____ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsungrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _____ kibur	- (5)
15. Mejanga onü	- (5)	13. Tebur tembar tsungda jatepba	- (4)
16. Tzü shiruru ka	- (4)		

**OLONG PAITEP # 6544 TELANGZÜBA**

TIPLIN :		LANGTSÜNGLEN :	
1. Semtu, 3. Lepko, 5. Bilem,		1. Sayu, 2. Teb, 4. Kimong,	
8. Ulu, 10. Tsung pang,		6. Lungkak, 7. Milak, 9. Zunga,	
11. Tesangwa, 13. Aoksa,		10. Temopu, 12. Walu, 14. Ali.	
15. Putir, 16. Yipru.			

**NAI-A YA METETTER MA**

**IPL 2023 ASAYAMUNG NUNG ASAYAR NEM SEN TIEMTIBA AGÜTSÜR ASAYADAKTSÜBA TEMATIBA 20 YAMAI LIASÜ :**

- 1. Sam Curran (Punjab Kings) : 185 million rupees (approximately \$2.26m)
- 2. Cameron Green (Mumbai Indians): 175m rupees (\$2.14m)
- 3. KL Rahul (Lucknow Super Giants): 170m rupees (\$2m)
- 4. Ben Stokes (Chennai Super Kings): 162.5m rupees (\$1.98m)
- 5= Nicholas Pooran (Lucknow Super Giants): 160m rupees (\$1.95m)
- 5= Ravindra Jadeja (Chennai Super Kings): 160m rupees (\$1.95m)
- 5= Rishabh Pant\* (Delhi Capitals): 160m rupees (\$1.95m)
- 5= Andre Russell (Kolkata Knight Riders): 160m rupees (\$1.95m)
- 5= Rohit Sharma (Mumbai Indians): 160m rupees (\$1.95m)
- 10. Ishan Kishan (Mumbai Indians): 152.5m rupees (\$1.86m)
- 11. Hardik Pandya (Gujarat Titans): 150m rupees (\$1.8m)
- 11= Rashid Khan (Gujarat Titans): 150m rupees (\$1.8m)
- 11= Virat Kohli (Royal Challengers): 150m rupees (\$1.8m)
- 14. Sanju Samson (Rajasthan Royals): 140m rupees (\$1.7m)
- 14= Deepak Chahar (Chennai Super Kings): 140m rupees (\$1.7m)
- 16. Harry Brook (Sunrisers Hyderabad): 132.5m rupees (\$1.6m)
- 17. Shreyas Iyer \*\* (Kolkata Knight Riders): 122.5m rupees (\$1.5m)
- 18. Varun Chakravarthy (Kolkata Knight Riders): 120m rupees (\$1.45m)
- 18= Jasprit Bumrah\* (Mumbai Indians): 120m rupees (\$1.45m)
- 18= Axar Patel (Delhi Capitals): 120m rupees (\$1.45m)

**Army ketdangsür ta shia lanurtem ashioktsür ka apu**



**Guwahati, June 13, 2023** nisung apu. Iba nisung ya arishi km 41 ta meszüka senzü aser (Agencies): Assam nung Iba nisung ya arishi km 41 pai yariteptsü ta shia Kamrup Rural kübok Baihata tain Matiur Rehman ta lanurtem dang nung sen Chairali nung police-i Army jangjaogo. Pa ya Darrang meshia agi. ketdangsür ta shia lanurtem distric kübok Muslim Ghopa Iba dak sendakba nung ashioktsür ka apu. nung alir. nung Indian Rangia Police Station nung June 12, 2023 anepdang Pa ket nung taila Indian First Information Report 10:30 ako meta Gajraj Army identity card aser Maruti (FIR) ka benokogo aser Intelligencers-i osang ka Suzuki Baleno gari ka apu. Rangia PS nung Officer-in-Charge (OC)-i anir angazükba sülen Assam Rehman-i lanurtem dang bushisung dang südar. Police-i mapa inyakdang iba Indian Army nung aniooktsü

**Tripura Legislative Assembly paperless akümstsü**

**Agartala, June 13, 2023** dang amshiba ajanga timtem NeVA tenzükba ajanga (Agencies): Tripura Chief ajurur aser sorkari linük mapang kümzüksü, paper Minister Prof Dr Manik Saha-i ajungalen digitization amshiba ajemtsü aser electronic 'Training Program of Members of Tripura Legislative kümdaktsütsü mapa inyaker" ta amshiba ajemtsü aser electronic voting systems tenzüktsü, ta Assembly' tenzüktsüogo. Chief Minister Saha-i ashi. CM Dr. Saha-isa metetdaksü. "NeVA application ajanga Iba sentong nung Assembly documents zübazüba angutsü Speaker Biswa Bandhu Sen, akok. Iba application ajanga Deputy Speaker Ram Prasad sorkar mapa tajungba aser Paul, Chief Whip Kalyani Roy, ochishia inyaka ottetsü aser Parliamentary Affairs minister senotsü kümzüksü" ta Dr. Ratan Lal Nath, Finance Saha-isa ashi. minister Pranajit Singha Roy, "NeVA maparen inyakba India sorkari digital program leader of the opposition Animesh Debbarma aser state kar rongnung Tripura dena tenzükba nung NeVA ya tongtipang shilem ka lir ta paisa tanga MLA o ketdangsürtem lir aser assembly ya paperless ashi. ash.

**Assam kübok distric asem nung tzmetsung ajanga timtemer**



**Guwahati, June 13, 2023** ASDMA-isa ashi. Revenue and Disaster (Agencies): Assam kübok Ano, tesüiba anogo ananü Management Principal distric asem nung tzmetsung tzunglu aruba ajanga Cachar Secretary Gyanendra Dev timtem ajanga tanur 97 dena distric kübok Silchar jila nung Tripathi dang tzmetsung nisung 575 tashi timtemer. tesem aika tzu agi mobang ta ajurutsü akok ta bilemba distric Udalguri distric, Sonitpur tem aser talisa Dima Hasao distric aser Cachar distric nung nung NDRF aser SDRF tzmetsung timtem ajurua lir ta nübotem mapa lezmüksütsü Assam State Disaster Management Authority metetdaksü. Dr Himanta Biswa Sarma-i ASDMA-i metetdaksü. Deobarnü DC aser tongti ketdangsürtem den video conference ajanga senden ka yimtsung 10 nung kongshioغو aser tsünusenbongtsü ali menogo. Chief Minister Sarma-i aser tsünusenbongtsü ali hectare 150 metsungbanga lir ta Chief Minister Sarma-i tetuyuba agütsü.

**GOVERNMENT OF NAGALAND  
DIRECTORATE OF SCHOOL EDUCATION  
KOHIMA: NAGALAND  
NOTIFICATION**

NO. ED/EST/A/32/MKG/2022

Kohima the 9th June 2023

In continuation of this Office Advertisement of even number dated 29.04.2022, Notification of even number dated 26.10.2022 and Notification of even number dated 22.11.2022 for the recruitment of 1 (one) LDA cum Computer Assistant at Sub-Divisional Education Office, Changtongya, Mokochung it is hereby notified that on the basis of marks secured in the written exam, computer test and viva voce, Shri. Tiatemjen Jamir bearing Roll no. 930 has been selected for appointment.

**(THAVASEELANK) IAS  
PRINCIPAL DIRECTOR**



Taoba US Tir Donald Trump bukumer tem Doral, Florida nung Trump National Doral resort tezülen rally ka agidang tangokba noksa nung angur.

**Saudi Arabia-i July ita totzü tajemba ayoktsü**

**Vienna, Aami/June 13 (Agencies):** Alima nung totzü adokba linük tulutemi tentetba OPEC+ pur totzü jenjang tashi meiti akumba aser totzü peria anguba ajanga mechi Saudi Arabia-i tang alima dang ayokba totzü anogo nung barrels million ka agi tajemba agütsüsü ta ashi.

Taoba mapang OPEC+ züngsem temi totzü atsüba anaben ajemaka totzü jenjang timba kumdahtsüsü merangba nung takok manguba sülen totzü tazü jenjang ajemba nung yaritsü atema production cuts ya July ita alitsü, ta Saudi Arabia-i Deobarnü ashi.

OPEC+ ya Organization of the Petroleum Exporting Countries aser Russia-i aniba linük tem lir aser Vienna nung parnok indang headquarter nung ghonda tenet tashi jembishini akaba sülen iba mera ya agitsü pangjem aser taoba mapang totzü agütsüba nung ajema aliba 2024 kum tatem tashi alitsü aser ano anogo nung barrels million 1.4 ajemtsü molungtepa liasü.

"Onok atema ibai anogo tuluka lir, kechiaser tang agreement yangluba ama kodanga meyanglu. Tang production targets yanglua aliba ya kanga agi tajungba lir," ta Saudi Energy Minister Abdulaziz bin Salman-i osangbener senden ka nung ashi.

Riyadh-i totzü ajema ayoktsü lemtetba ya nungdakra July ita kisung masütsü, ta pai ashi. Russia, Nigeria aser Angola

linüktem tang totzü atsüba den sako kumdahtsüsü asoshi parnoki item linüktem indang production target ajemtsü ajanga temelenshi kangabo malitsü.

United Arab Emirates bo timba atsüsü mela.

Alima nung totzü tazü atsüba shilem 40 shi OPEC+ nungi lir, anungji parnoki telemtetba agiba ajanga totzü jejang nung kongshitsü.

Parnoki anogo nung barrels million ana ajemtsü taoba kum molungtepa tang tashi lir aser ibaji alimai agiba shilem ana lir.

April ita parnoki ajunbena par sasa anogo nung barrels million 1.6 ajemtsü molungtep, koba May ita nungi tenzük aser 2023 kum tatem tashi alitsü.

Ajisüaka item ajemba yagi totzü jenjang timba akumba mapang talangkabo meliasü.

International benchmark Brent crude nung barrel ka nung sen \$87 akum, saka parnoki 'post-cut gains' yutsü aser tawa barrel nung sen \$75 dang tajemba nung lir. United States crude ya sen \$70 dang tajemba akum.

Totzü jenjang ajemba ajanga US nung gari amshirtem sen talangba yong totzü inoktet aser alima nung osettsüset jenjang tera tajemba akum.

Totzü jenjang ajemba ajanga euro amshiba European linük 20 nunga osettsüset jenjang ajema akum, koba Russia-i Ukraine amak metenzükdang aliba jenjangi alu.

US aser Europe nung rongsenketzung tashi maitba

akumtsü südi ta bilemer, aser China nung COVID-19 tenokdangba salaba sülen aikati imlaba dang tajemba liasü.

OPEC ajanga totzü jenjang raksatsür aser titzü jenjang tali kumdahtsüba ajanga alima rongsenketzung nung timtem ajurur, ta anüolen linük temi OPEC aitsür. Moscow-i Ukraine amakba mechi anüolen linük temi Russia nem tenokdangba agüja liaka OPEC ya Russia den lir, ta West-i aitsür.

Asian linüktem, talisa China aser India-i Russia nung totzü timba alizük aser anüolen linük temi Russia nem sanction agütsüba nung adentsü memolung.

Tang tesüsa production cut ya ajanga totzü jenjang timba akumtsü aser yangji petrol dena lir.

**ALI TAYOKTSÜ LIR**

AT SEITHEKIMA (A) Near Nagamese Church  
Dry Land, Rs. 95 Per Sq.ft (Negotiable)  
Plot size available as per your budget.  
Contact: 9612448446 / 8974571416

**Niger ayong nung rong ka mekupok; nisung 100 sür alitsü ta bilemer**

**Abuja, Aami/June 13 (Agencies):** Niger ayong nung Hombarnü rong ka mekupokba sülen nisung 100 shi sür alitsü ta bilemer.

Tenük kuli agütsürtemi Al Jazeera dang ashiba agi, iba rong nung kiyimba sentong nung adeni aoertem mena liasü, shirnok Niger State anasa sentong nung adenba sülen Kwara State-i meyipa oya liasü.

Local daily Nigerian Tribune sangdong ka ajanga ashiba agi, rong nung mena alirtem ya Kwara kübok Kpada, Egbu aser Gakpan yimtsing nungi liasü aser kiyimba benjung ya Niger State kübok Egboti yimtsing nung agi.

Al Jazeera correspondent Ahmed Idris-i Abuja nungi ashiba agi, rong ya tzü nung langka ka nung atsük aser iba

sülen mekup. "Parnok timba life vest amala protective gear tem sema maliasü ta jangjaogo. Iba lendong nung asür nisung 60 den asüpila sentongbo agiatokogo," ta pai ashi.

Idris-i ashiba agi, Hombarnü nungi tekümzükba maparen balala benoka inyaksangshidar.

Police-i tang tashi nung nisung kwi asü mesüra rongnung nisung kwi mena liasü iba indang osang tejangja magütsüseti lir.

Kasa tesem nung taoba mapanga lendong atalokogo, koba Niger aser Benue ayong longtepba tesem ka lir.

2021 kum May ita Niger ayong nung iba tesem anasa rong ka mekupok, ta local daily The Guardian-i metetdaksü. Iba lendong nung nisung 160 asü.

**Küm 16 sülen East Africa bloc nung Eritrea denogo**

**Asmara, Aami/June 13 (Agencies):** Küm 16 sülen Eritrea tanaben regional bloc ka nung denogo, ta information minister-i Hombar aonung sangdong ka ajanga metetdaksü.

Somalia nungi al-Shabab telungpurtem mintoktsü atema Ethiopia nung sepaitem yokba anema 2007 kum Asmara-i Intergovernmental Authority on Development in Eastern Africa (IGAD) nungi atsüingina liasü.

"Eritrea IGAD nung denogo aser Djibouti nung 14buba Ordinary Summit agiba mapa parnok indang menden meyipa agiogo," ta Information Minister Yemane Meskel-i senden amenba sülen Twitter ajanga metetdaksü. Parnok kechiba iba lokti tentet nung adentsü atema telemtetba agi, iba indang pai kecha mashi, saka ashiba agi, Eritrea-i tanga IGAD züngsemtem den longjemer iba tesem nung yimjung asoshi inyakba nung teyari agütsüner.

1993 Ethiopia nungi nüjiso anguba sülen Eritrea ya Isaias Afwerki-i yimsü süa arudar. Parnok Ethiopia den arrtsü atema 1998 nungi 2000 tashi

rara aser iba sülen maneni mangatettep adoka arudar.

Maneni meimchir temeden anema inyaksangshiba atema parnok nem United States aser European Union-i tenokdangba agütsür lir.

Ajisüaka parnoki tawa tesendaktep yanglushitsü atema jenjang agidar.

Eritrea-i 2018 kum Ethiopia den yimjung asoshi tenangzüktepa ka yanglu aser iba ajanga arrtsü nung mangatettep adoka ajanga tenzükdaksüba rara tembanga liasü. Parnokisa Somalia den tesendaktep yanglushi aser Djibouti aser Kenya na dena tesendaktep akangshia liasü. Kenya-i takum Asmara nung embassy ka lapoktsüba sangdongogo.

Ajisüaka human rights teloktemi ashiba agi, Afwerki yimsüsüba ya taoba mapang ama dang lir. Linük military-i tashiyim kanga amshir aser iba ajanga kum shia nüburtem aika tanga linüki jenshia aoer. 2023 Global Slavery Index ajanga Eritrea, Mauritania aser North Korea nung 'modern-day slavery' timtiba lir ta sayuogo.



Mayon volcano nungi tzüsem tatsük adokba Daraga town, Albay province, northeastern Philippines nungi angur. Mayon volcano tanemi pokteta adokba nungi molushi tatsük jateta adokba ngua iba anasa aliba Philippines nungertem Mongulbarnü jena ao.

## NWA-i Nagaland tenüing nungi asayatsü atema asayar 5 shimogo



Asayartem den coach aser manager Kohima nung Mongolbarnü tangokba noksa nung angur.

**Kohima, Aami/June 13 (TYO):** 32buba Senior National Wushu Championship 2023 nung Nagaland tenüing nungi asayatsü atema Nagaland Wushu Association-i asayar pongu shimogo.

Iba asayamung ya June 26 nungi July 1 tashi Pune, Maharashtra nung asayatsü renema lir.

Mongolbarnü IG Stadium Kohima nung trail agi, kong asaya 12-i shilem agia liasü. Asayamung atema shimba asayartem rongnung Rakesh Mahato (70kg), Shemele Rhakho (56 kg) Kethosilie Kuosa (52kg) Atokivi T Chishi

(60kg) aser Keyisuiding Lungalang (75 kg) densema lir. Tema ya coach Gabriel Khamo aser team manager Azhove Resu nati anir aotsü, ta NWA sangdong ka ajanga Mongolbarnü metetdaksü.

Kohima nung sentong tatsüka agiba mapang NWA Vice president Akhozo-i, asayartem dang, state nem konang tetushi bener arutsütsü atema takok tashi bendanga agüja asayatsü ajungshi. Paisa, asayartem dang iba asaya ajungkettsü atema association-i takokba tashi inyaksü ta tenangzükba agüja liasü.

Wushu asaya ya Nagaland

nung anog kanga asaya tasen ka ta shia, pai state nung iba asaya benoktsü atema coaching camp tali ayongzükba agitsü ta ashi.

NWA tir aser Advisor CAWD & Taxes Kudecho Khamo-i pai iba mapa bener aliba mapang state nung wushu asaya ajungkettsü atema süoki ia bilemdar ta shia pai, tir-i wushu asaya nung Nagaland nungi national jenjang nung medal angur adokdaksütsü nükjidong lir ta ashi. Iba dak sendakba nung pai shilem agirtem dang takok angutsü atema nükjidong tulu ayutsü ajungshia liasü.

## Kohima DC-i Inter-School Athletic Meet indang osang agütsü

**Dimapur, Aami/June 13 (Agencies):** "Beti Bachao Beti Padhao" program kübok Kohima District Administration, District Sports Officer Kohima aser Kohima District Athletics Association longjemmer July 20 aser 21 nü Indira Gandhi Stadium Kohima nung Inter School Athletic Meet ka ayongzükogo.

Tetoktepba ya tetsürtem atema Athletics asaya asütsü,

koba U-14 aser U-18 ta category ana küma lemsar asayatsü.

Iba dak sendakba nung Deputy Commissioner Kohima, Shanavas, C IAS-i, Kohima district kübok iba asayamung nung shilem agitsü jangraba High Schools aser Higher Secondary School ajakdang form tem District Sports Officer (IG Road, Opp, SCERT Office);

District Education Office Kohima (Scett. Road below NBCC Convention Hall); SDEO Kohima (Scett.Road below NBCC Convention Hall) aser SDEO Chiephobozou nungi agizüktsü metetdaksüogogo.

Form tem June 14 nü nungi tenzükba agütsütsü aser July 14 nü tashi nungbo District Sports Office nung benoktsü atema metetdaksüogogo.



Women's Junior Asia Cup akokba sülen SAI Bengaluru nung tetushi agütsüba mapang Indian Junior Women's Hockey team nungi asayartem pelatepba noksa nung angur.

## Indonesia Open: Sindhu aser Prannoy na Prequarters-i iogo

**Aami/June 13, 2023 (Agencies):** Mongolbarnü Indonesia Open World Tour Super 1000 event tetsür kija asaya mezüngbuba round nung PV Sindhu-i straight game nung Gregoria Mariska Tunjung kokogo.

Olympic nung medal ana tashi ngur alila shiba taoba asayamung ana nung mezüngbuba round nung tsüka liasü, lai iba asaya 21-19 21-15 agi minute 38 nung ayong ayonga koka pre-quarterfinal-i iogo.

Sindhu-i tang mezüngbuba Tunjung madak takok nguogo. Lai taküm küm tetenzüklen Madrid Masters final aser Malaysian Masters semifinal nung Tunjung mekoki liasü.

Sindhu shiba tang rankings nung world No 13-i asepzüka lur lir lai asaya junga metenzüklet aser mapang ka nungbo la 9-7 agi tesülen liasü, ajisüaka iba sülen lai asaya tepeyong kanga junga asaya-a takok nguogo.

Sindhu taruba asaya third seed asayar Tai Tzu Ying den asayatsü, koba kanga melarabo masütsü. Tena tsüingda tang tashi nung 23 ben asaya lir aser Tai Tzu-i 18benbo koka lir.

Kasa asayamung tebur kija asaya nung tang kanga junga asaya aliba India nunger asayar HS Prannoy-i 21-16 21-14 agi Japan nunger asayar Kenta Nishimoto madak takok nguogo. Tena tsüingda minute 50 asaya liasü.

Seventh-seeded India nunger asayar yagi taoba ita Malaysia Masters Super 300 title benogo aser pa tanabuba round nung Hong Kong nunger asayar NG Ka Long Angus den asayatsü.

Tetsür tarep asaya nung Treesa Jolly aser Gayatri Gopichand na mezüngbuba round nung Japan tsür tarep Rin Iwanaga aser Kie Nakanishi nati tsükdaksüogogo.

Commonwealth Games nung bronze medal ngur aliba tarep yagi mezüngbuba game nung tena tejakdang süer asaya aliba maongka magitet aser asaya 22-20 12-21 16-21 agi mekoki liasü.

Tebur tarep asaya Satwiksairaj Ranikreddy aser Chirag Shetty nata mezüngbuba round nung Indonesia nunger tarep Marcus Fernaldi Gideon aser Kevin Sanjaya Sukamuljo na den asayatsü.

## AFC U-17 Asian Cup nung India team Thingujam lenisüba nung asayatsü



India head coach Bibiano Fernandes aser Korou Singh Thingujam noksa nung angur.

**Aami/June 13, 2023 (Agencies):** India Under-17 boys' football team head coach Bibiano Fernandes-i Mongolbarnü AFC U-17 Asian Cup nung India U-17 National team captain asütsü atema midfielder Korou Singh Thingujam shimba sangdongogogo.

Iba asayamung atema asayartem nem kits tem lemsüba sülen arishi küm 16 tain asayar ya AFC U-17 Asian Cup Thailand 2023 atema team captain asütsü asoshi shimba sangdonga liasü.

"AFC U-17 Asian Cup amala asayamung ka nung India team captain asütsü shimba ya khuret tulu lir aser Korou iba khuret abentsü temsüa lir ta onoki bilemer," ta Bibiano Fernandes-i ashi.

Korou shiba tetenzük nungi team nung dena liasü pa ya asayaba moapu nung kanga

tongtibang asayar ka kümogogo. SAFF U-17 Championship aser AFC U-17 Asian Cup Qualifiers nung goal kaka idaksüba sülen team Spain aser Germany nung oa Atletico de Madrid, Real Madrid, VfB Stuttgart, FC Augsburg amala team tajungtem den asayaba mapang pai kanga junga asayaogogo.

Europe nung asaya 10 asayaba mapang pai goal asem idaksü aser assist 10 süja liasü. Iba sülen parnoki Thailand-i oa local club kar den asayaba mapang pai ano goal ka idaksü aser ka assist süja liasü.

India U-17 team ya tang Khoya Yai Sports Complex, Thailand nung training agidar aser AFC U-17 Asian Cup metenzük tsüingda parnok June 14 nü linük yimtibai aotsü. Iba asayamung nung India team Group D nung Vietnam (June 17), Uzbekistan (June 20), aser Japan (June 23) den asayatsü.

## BILEMDANGANG

"Teyazü jembia nisung ka anitesungzükdaksü."